



JUDICIAL SYSTEM MONITORING PROGRAMME  
PROGRAMA DE MONITORIZAÇÃO DO SISTEMA JUDICIAL

*Komunikadu Imprensa*

Periodu: 2010

Edisaun: 05 Novembru 2010

**JSMP halo Audiência ho Prokuradór Jeral da República**

Iha loron 28 fulan Outubru 2010, Programa Monitorizasaun Sistema Judisial ka JSMP marka audiência hamutuk ho Prokuradór Jeral da República iha Eskritória Prokuradora Geral da República iha, Rua de Colmera, Dili.

Audiência ne'e marka tan pasu positive ida hodi hametin kolaborasaun servisu intitucional no intruduz JSMP nia papel ba Exelensia Prokudora Geral da República. Audiência ne'e hanesan audiência seluk ne'ebé antes ne'e halo ona ho Prezidente da República<sup>1</sup>.

Prokuradória Geral da República (PGR) nu'udar orgaun superior ba Majistradu Ministériu Públiku sira nian, nu'udar instituisaun xave atu hametin defeza ba interesse públiku no defende legalidade demokrátiku no soberania estado nian tuir konstituisaun haruka, tanbá ne'e mak importante atu hametin kolaborasaun servisu ho Prokuradória Geral da República no buka oferese apoiu adisional ruma ne'ebé nesarriu, haktuir Luis de Oliveira, Direitór JSMP iha audiência ne'e.

Liu tan nia hatutan, JSMP nu'udar grupu sosiedade sivil no nu'udar úniku organizasaun ne'ebé hala'ó monitorizasaun iha Tribunál sira hotu iha Timór Leste inklui Tribunál Rekursu, iha komitmentu boot teb-tebes atu hametin relasaun servisu ho entidades judisiariu hot-hotu hodi halo esforsu kolektiva atu hari'í no hametin justisa ba ema hotu. Tanbá ne'e audiência ne'e nu'udar sinal no pasu progresivu ida atu hametin no hatu'ur sistema justisa tuir nia fatin.

Iha parte seluk, hafoin rona tiha introdusaun sumáriu husi delegasaun equipa JSMP, Exelênsia Prokuradora Geral da República, Sra. Dra. Ana Pessoa Pinto, iha nia intervensaun haktuir katak durante ne'e Prokuradora Geral da República sempre akompaña atividade no publikasaun relatóriu sira ne'ebé JSMP produz. Dala ruma nia konkorda ho JSMP iha asuntu balun no dalaruma mós bele iha opiniaun diferente ho JSMP. Tuir PGR katak, ema hot-hotu iha direitu atu halo interpretasaun ba lei no sistema justisa ne'ebé dezemvolve-an dadaun ne'e. Hanesan mós poziasaun JSMP nian, konabá kestaun Poder Prezidensiál ba Indultu, tuir Prokuradora Geral

---

<sup>1</sup> Iha loron 22 fulan Outubru 2010 JSMP hala'ó ona audiência ho Prezidente atu alenide apresenta submisaun konabá pozisaun JSMP nian konabá kestaun indultu, audiência ne'e mós atu fo hanoin no husu apoiu moral husi Prezidente atu apoiu funsionamentu setor justisa.

República katak tenke iha medida legislativa ruma atu administra poder ne'e. Maske nune'é, nia la konkorda ho opiniaun balun ne'ebé dehan katak to'o oras ne'e la iha lei, tanbá tuir Prokuradora Geral katak Konstituisaun mós hanesan Lei ida no nu'udar Lei ne'ebé superior liu iha Timór Leste.

Aleinde ne'e, asuntu balun ne'ebé konsidera nu'udar preokupasaun iha setór justisa mak kestoins konabá interpretasaun lei iha prátika judisiariu nian iha tribunál sira. Prokuradóra Geral da República sente preokupadu tebes konabá interpretasaun ba provizaun sira konabá aplikasaun medida koasaun hanesan '*TIR*' (*Termu Indentidade ba Rezidencia*), aplikasaun '*Pena Suspensaun*' ba *Kondenadu* no interpretasaun aplikasaun artigu 125 KPP<sup>2</sup> konabá '*rekuza lejítima ba depoimentu*' ba kazu ne'ebé involve membru família ka kazál sira. Tuir Prokuradóra Geral katak sé autor judisiariu sira la halo interpretasaun ho apropriadu no ho kuidadu, bele afeita sentimentu publiku atu tau konfiansa ba setór justisa formal. Ba razaun hirak ne'e tuir Prokuradóra Geral da República katak, defisil atu hetan justisa ne'ebé justu iha tribunál nune'é mós comunidade se la fiar ona ba sistema judisiariu iha Timór Leste.

Nune'é mós nia hatutan katak, atóres tribunál sira nia kakutak sempre nakonu ho pensamentu direítus umanus. Tanbá ne'e bainhira sira diriji prosesu julgamentu ba kazu ruma, dala-barak liu tau konsiderasaun máximu no preokupa deit ho direítu arguidu sira no haluha tiha direítu parte sira seluk hanesan lezada ne'ebé hetan sofrimentu tanbá kauza husi aktu violénsia ne'ebé arguidu sira halo hasoru sira nia direítu umanus. Tanbá ne'e kuaze kazu grave sira hanesan homósidiu no violasaun (seksual), maioria to'o deit iha aplikasaun medida '*termus identidade residencia*' ba arguidu sira. Aleinde ne'e, tribunál mós toman liu atu aplika pena suspensaun ba kazu sira ne'ebé nia moldura penal la aas liu tinan tolu. Realidade hanesan ne'e afeita tebes ba sentimentu vítima sira ba prosesu justisa tuir loloos atu rekopera no hadia fila fali sira nia direítu violadu. Situasaun hanesan ne'e prejudika tebes sira nia direítu no prejudika mós sentimentu publiku ba justisa ne'ebé justu no kredível iha comunidade sira nia oin.

Refere no refleta ba realidade hirak ne'e hotu, internalmente iha Prokuradória Geral da República sempre iha diskusaun regular atu halo interpretasaun ne'ebé apropriadu no lójiku ba lei sira hotu inklui enkoraza majistradu sira atu servisu ho responsabilidade no meritu, inklui provizaun konabá indemnizasaun iha akuzasaun ministériu públiku nian nomós estabelese no funsiona prokuradória distritál sira hotu iha kada jurisdisaun hot-hotu. Aleinde ne'e iha mós planu atu estabelese prokuradoria delegasaun iha distritu balun ne'ebé indetifika nesesáriu atu halo ida ne'e.

Iha parte seluk, hatan ba pedidu JSMP nian atu hametin relasaun servisu institusional, Senhora Prokuradóra Geral da República nakloke ba inisiativa hot-hotu, inklui atu hetan apoiu ruma ba pedidu atu halo entrevista ka pergunta ka preokupasaun husi publiku ne'ebé JSMP lori mai husi

---

<sup>2</sup> Antes ne'e, JSMP lansa relatóriu analitiku ida konabá aplikasaun Artigu 125 KPP iha tinan 2009 ho titlu: *Provizaun Artigu 125 Kódigu Prosesu Penal: Lori Implikasaun Dilematiku ba Vítima Violénsia Doméstika*. Favor lê informasaun kompletu iha website JSMP; <http://www.jsmp.minihub.org>

area rurais sira. Agora dadaun Prokuradória Geral da República servisu hamutuk ho UNDP atu dezemvolve programa rádio comunidade ne'ebé iha possibilidade atu involve JSMP iha sesaun balun husi programa refere.

Audiência ne'e taka ho pedidu adisional husi JSMP atu hetan apoiu husi Prokuradora Geral da República atu apoiu JSMP ba Centru Formasaun Judisiariu (CFJ) ho forma ne'ebé la hanesan ho saída mak agora dadaun lao hela iha CFJ. Relasiona ho kestaun ne'e Prokuradora Geral da República haktuir katak nia sei buka atu ko'alia asuntu ne'e ho Ministério da Justisa.

Atu hetan informasaun kle'an favor kontaktu diretamente:

Luis de Oliveira Sampaio

Direitor Executivo JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Landline: 3323883